

Diuz Riji Bakmbanj

村头的小溪

Ndawsim moix boux doengzhag raeuz, cungj miz aen dieg guh'angq he, de couh lumj fwed biengzbeih, vih raeuz bu ndei seiznyez hajsae, dieg ndei guh'angq gou couhdwg diuz rijiq bakmbanj.

Haetromh, rumz ci daeuj, roeglwg ndiu lo, duzbya ndiu lo, dujva, go'nywj ndiu lo, gyoengqdou hix deng ci ndiu lo. Buet daengz henz rijiq, cijraen raemxrij sawdikdik, duzbya youq ndawraemx angqyangz diuq foux, lij seiz mbouj seiz diuq ok najraemx; duzroeg daj gwnz gyauej mbin gvaq eu fwen "cici", vunz dingq le simsangj dangqmaz, henz rij nywj mwncupcup, heuswdswd, caen dwgyaez, gwnz dieg couh lumj daenj geu buhloeg he. Raq rumz ci daeuj, mbawfaex "sasa", caeuq duzroeg itheij, gyonj baenz diuz go ndaw ndoeng ndei dingq raixcaix he.

Banringz, youq henz rijiq, couh dingqny sing saeg buhvaq "biba biba" caeuq sing riu haha gyoengq mehbaj, hix yawjraen lwgnyez youq ndaw-rij guh'angq, raemxrij lumj gaiq gingq nei, ingj ok mbwn lamz fwj hau, duzbya youq ndaw raemx youz, duzbit heuh "gaga" youq gwnz najraemx youz, rumz ci gvaq najraemx couh fubfabfab, ndei yawj dangqmaz.

Banringzgvaq, dou youq henz rij cuengq yiuhrumz, dwkgeiz, dingq goenglaux, yabuz ganggoj.....Mwh daengngoengz doek congh, fwjgyapbya saj roengzdaej, saj youq gwnz diegnywj, saj youq bouxvunz guhhong ndaw doengh, hix saj youq gwnz fajnaj gyoengqdou. Ninz youq gwnz diegnywj, ndei yawj dangqmaz, fwjgyapbya hawj gou simsoeng.

Banhaemh, boux vunz ndeu bae henz rijiq,



ronghndwen hausagsag saj daengz gwnz najraemx, haujlai ndaundeiq baez yap baez yap, ciuq rongh le gwnz dieg, raq rumz ci daeuj, gwnz raemx myigmanzmanz, lupva mbinfefe doek roengzdaej, doek ndaw rijiq, fat ok raq dem raq homva.

Diuz rijiq bakmbanj dwg seiznyez dieg ndei guh'angq gou, de lumj dahsau miz fwed, daiq angqyangz dou mbin youq gwnz mbwn sangngaungau.

(Vujsenh Yen Dungzlingj Cin Sinhlungz Siujyoz seiq nienzgaep Danz Mingzsenh boux lauxsae son'gyauq Lungz Ging'yiz)



Duzrwi Iq Gaenx

勤劳的小蜜蜂

Seizcin daengz lo, youq ndaw aen suenva gyaundeidei ndeu, va hoengzhoengz heuheu cungj hai lo, ndaw suenva miz duzrwi iq gaenx caeuq duzmoed iq gik.

Ngoenz ndeu, duzrwi iq gaenx cingq au dangz, caepcawq haeuxliengz coglaeng, duzmoed cix youq gwnz ganj faex ciengq go guhcaemz. Duzmoed iq raen duzrwi iq youq gyang cumhva mbin bae mbin dauq au dangz, couh gienq de: "Vei, duzrwi iq, mwngz guhmaz ha? Nyaengq bae nyaengq dauq." Duzrwi iq naeuz: "Gou cingq au dangz caepcawq haeuxliengz gvaq seiznit ha." Duzmoed iq naeuz: "Guhmaz naemj baenzneix gya ha! Lumj gou ciengq go baenzneix mbouj dwg gig soengsad lwi?" Duzrwi iq gienq de naeuz: "Mwngz lijdwg lumj gou nei gaenx guhhong ba, mboujnex seiznit, mwngz couh mbouj miz haeux gwn lo." Duzrwi iq naeuz liux couh baenq gyauej laebdaeb bae au dangz lo. Duzmoed iq naemj: Bouxwnq cungj naeuz ci daengz baihnaj bya itdingh miz roen, daengz seiz caiq ra haeuxliengz hix mbouj nguh, haengjdingh mbouj dai iek. Yienghneix duzmoed iq couh laebdaeb youq gizhaenx guhcaemz lo.

Baihneix duzrwi iq au dangz gaiq suenva neix liux youh dingq duzrwi henzgyawj naeuz: "Con gvaq ndoengfaex baihnaj, caiq heux gvaq goengq bya ndeu, couh miz aen suenva hung ndeu, ndawde va gak cungj gak yiengh, hoengzhoengz heuheu." Yienghneix gyoengq duzrwi couh caez con gvaq ndoengfaex baihnaj, heux gvaq goengq bya ndeu, daeuj daengz ndaw suenva au dangz lo. Caj gyoengqde au dangz liux buen daengz ndaw rongz yo ndei le, youh haindung gya na rongzrwi lo.

Yaepyet seiznit daengz lo, duzrwi iq gaenx youq ndaw rongz raeujrub, gwn dangzrwi ndeigwn. Dauqfanj duzmoed iq cix ra mbouj ndaej haeuxliengz, ra mbouj ndaej aen rongz hab youq, couh yienghneix mbouj gvaq geij ngoenz, duzmoed iq youh iek youh nit doeklaeng deng dai iek lo.

(Cough Swjhan)

Yinxdaeuz Saek Ci

堵车的乐趣

Gyajgeiz, gyoengqdou youq gwnz roen bae ranzlaux deng saek ci lo. Mwhhaenx heiqci hai ndaej menh raixcaix, couh lumj saehaexma raih. Mwngz aiq yaek naeuz lo, saek ci mbwq lai lo! Hoeng, gou dauq mbouj naenghbaxbued.

Youq duenh roen daegbied saek ndeu, heiqci dingz roengzdaej lo, gou yawjraen song henz roen miz haujlai faex hung. Go faex maj miz dujva hoengzhoengz heuheu, miz hoengz, miz henj, lijimiz maeq.....Gou lij yawjraen mbangj go faexroz, daj gyae yawj bae, gyoengqde couh lumj geij duz mauhnyinz.

Riengzlaeng, gou yawjraen duz biengzbeih ndeu youq gyang cumhva mbinfefe. Yawj! Youq gwnz fwed gyaueundeidei haenx lijimiz diuzraiz ndaem hau

doxgek. Biengzbeih yaep ndeu mbin daengz gyang cumhva, yaep ndeu mbin haeuj ndaw ndoengfaex. Danghnaeuz gou hix ndaej mbin cwxcwx caihcailh, yienghhaenx haengjdingh yinx dangqmaz.

Sawqmwh, gwnz cuengci miz song duz nengzgenz. Gyoengqde maj miz doiq mumhgok raezranghrangh ndeu, aen'gyaeuj samgak, aenndang luenzgyaeq caeuq roek ga raezsaeq. Gyoengqde benz bae benz dauq mbouj dingz, lij seiz mbouj seiz dingz roengzdaej yungh ga roqroq bohliiz, lumj naeuz: "Vaiq hawj gyoengqdou haeujbae ba! Gyoengqdou hix naemj lumj gyoengqsou nei cwxcailh naengh youq gwnz daengq." Ha, caen fangzhwnz!

Heiqci menhmenh hai baenaj, gou yawjraen baihgrog cueng ci gak cungj gak yiengh gvaq henzgyawj gou. Aen ci hung saekhoengz cang rim huq ndeu dingz youq henzgyawj gou. Gou gedqeq, yawjraen de gawqyienz miz cibseiq aen loekci, caen dwg "iucing sipndangj" ndaw gyoengq ci ha!

Mwhneix, gou yawjraen miz aen ci gouqganq 120 saekhau ndeu "vu vi vu vi" hai gvaq diuzroen wngqgip. De baenzneix gaenjgip, haengjdingh dwg bae gouq vunzsieng roxnaeuz vunz baenz bingh.

Heiqci laebdaeb menhmenh hai baenaj, gou lij yawjraen aen ci geizheih dangqmaz ndeu—De daegbied raez, raez miz haj roek aen gyauzceh iq yienghhaenx. De lij sang raixcaix, sang miz sam aen gyauzceh iq yienghhaenx. Ceiq geizheih dwg, de lij doz cib geij aen gyauzceh iq.

Mwngz yawj, yienznaeuz gwnz roen saek ci lo, hoeng gou mbouj mbwq saek di, dauqfanj yawjraen haujlai yinxdaeuz.

(Ngeih nienzgaep Gu Gyahniz)

